

# 1 Pita

Yesu wel wiak kutömweri sēen wē krismaki 34 pōta ök won sēen Pitaak ingre mor saō narōaan pep epwer retēng ēa. Pita pöp Yesuu ru 12 pörōakaan namp. Omēn pörō omēn narōak utpet mowesak pitēn, “Utpet yaaurō,” pēl mēēa. Pēl ēēnak Pitaak pit kōn wi kosangtak taē sak öpēnēak Yesu Kristoē ngōn ompyaut ngolöp wes mena. Pitaak pitēm Yesuu wel wiak wal ēautere kaalak waisēpnaaten kōn kosang wia pōtaan kēlangōn kat yawiem kōn wi kosang yewesaut kēlok nasēn ēēpnaat pēl weseē retēng ē mena.

## Pöt epēl wia.

Ngōn ngēs rēaut *1:1-2*

Anutuuk utpetetakaan kama niwaut *1:3-12*

Wēwē kōlam öpenaata ngōnte *1:13-2:10*

Kēlangōn akunetak ingre mor saurōa ēēpenaat *2:11-4:19*

Ingre mor saurōa irēak inēēn ēēpenaat *5:1-11*

Ngōn mēēt *5:12-14*

**1** <sup>1</sup>O Anutuu omēn arim ka songōnöt sēp wesak kas sē Pontasre Kalesiaare Kapatosiaare Esiaare Pitinia yang pötēēl repak wēaurō, ne Pita, Yesu Kristo pim ngōn yaaō omēn saupök arimēēn pep epwer retēng ē yaningk. <sup>2</sup>Ngaan Anutu Pep pim kōnōök pimēēn kom ē nuulēēn Ngēēngk Pulōök ngēēngk wes nuulēa. Pöt Yesu Kristoē ngōnte ngaarēk wak wēēn pim iitak i niirak kōlam niwasēpēnēak pēl ēa.

Anutuu komre kolapre mayaap pöt arim naē ulōl sak wiaap.

## Tiar wēwē ompyaō kutömweri wia pōten kor eim wē

<sup>3</sup>Anutu tiarim Aköp Yesu Kristo pim Pepapōn yaya maim öpa. Pim tiarimēēn ya ngēs kaō yaaō pōtak Yesu Kristo weletakaan wal ē ulmēak wēwē ngolöpēt nina. Pēl ēēn wēwē ngolöp pöt tiarim naē wia pōtaan Anutuu kup niwia pōta kēēt öpenēak kōn kosang wia. <sup>4</sup>Pēl yeē pōtaan tiar Anutuu mor kol yaō niia pöt öpenēak kor eim wē. Pöt kumkum ēēre köt sē pēl naēnöt kosang wiaapnaat arimēēn kutömweri wia. <sup>5</sup>Ar Kristoon kōn wi kosang wesak wē pōtaan Anutu pim weēre kosangōök ngarangk elnieim wē. Pēl ēēn akun kaōaō temanöm yesēn pim utpetetakaan kama niwak ompyaō elniipna pöt tekeri wesak pēl elniipnaat. Pēl ēēpna pöt kopēta wes pet ira.

<sup>6</sup>Pötaan ërëpërëp yaaurö. Pël yaëen Anutuuk morök nant elniipënëak kön wiin pangk ëen pöt akun kot nent arim naë këlangön nant orööpnaat. Pël yaëen ërëpërëp ëen. <sup>7</sup>Morök pötök arim piin kön wi kosang yewesaut yaapët pöt tekeri wasëpnaat. Kool pöt wiapöt esuwesök pim songönte war yewas. Ën arim kön wi kosang yewesaö koolöt il yewas pöt morök elniin kosang wia pöt tekeri wasën Yesu Kristoë orööpnaatak Anutuuk ya kë sak yaya yeniem ë nirangiak ping wesak niapnaat. <sup>8</sup>Yesu Kristo arim itnaangkën ëaupön lup sant yaalmë. Peeneeta itnaangkën tapöpön kön wi kosang wesak ërëpërëp kaö yeë. Arim ërëpërëp pötak yangeraköt il yewasën pöten këmötök war wesak naengan. <sup>9</sup>Arim ërëpërëp yaauta songönte epël. Piin kön wi kosang yewesautaring wë pötaan Anutuuk ar utpetetakaan kama yanu.

<sup>10</sup>Anutuu ar utpetetakaan kama yanu pipët, pim tektek ngön yaaö omnarö pöta songönte koirëpënëak ap weseima. Pël ëak Anutuu komre kolap nimpënëak ëa pöt war wesak pöta songönten këëkë kön nawiin ëa. <sup>11</sup>Kristo pim Ngëëngk Pulö pitëm lupötë wë Kristo këlangön kat wiak kutömweri isak ëwaatak öpënëak mëëa. Pël maan pit, “Akun taltak ma ke tolëël yaëen Kristo pi pël ëëpën?” pël maimeë kangkkangk ëeim wakaima. <sup>12</sup>Anutuuk pitën, “Arim ya yamëngk epot kaamök naalniipan, omën ënëmak orööpnaarö kaamök elmëëpnaat,” pël mëëa pöta këët arim naë yaarö. Pitëm ya yamëngkem ngön war wesa pöt, Ngëëngk Pul kutömweriaan wes mëën irëa pöök omën narö kaamök elmëën ngön ompyaut ök niaan kat wiaurö. Ngön ompyaö pöta songönte enselöröakta ewat sëpënëak kent kön yawiitak pangk pël naën yaë.

### **Anutuuk ngëëngk öpenëak yenia**

<sup>13</sup>Pötaanök könöt wotpil wesak këëkë ngarangk ëeim ön. Pël ëak Yesu Kristoë tekeri sëpnaatak komre kolap war was nimpnaaten kön kosang wieim ön. <sup>14</sup>Ar Anutuu ruurök pim ngönte ngaarëk weë. Ngaan ngönën köpël wë kentre kauratë ënëm ëeiman pöta ök ëënganok. <sup>15</sup>Anutu, ar pim ru sënëak yas niaup, pim ngëëngk wë pöl arta ngëëngk sak wë omnant ëen. <sup>16</sup>Pöta ngönte ngönëntak epël wia. “Ne ngëëngk wë. Pötaanök arta ngëëngk ön.”

### **Yesuu iitak utpetetakaan ent ë nuulëa**

<sup>17</sup>Anutu, arim Pep pël mëak yaya yemak pöp, pi omën isaare irëaurö, mööngkraar kangk naalmëen yaaup. Pi tiar neenem omnant yaautë ökök ngön ë pet irëpnaap. Pötaanök yangerak önëël piin kasinkasin elmëeimeë ompyaö ëeim ön. <sup>18</sup>Ar ewat wë. Arim ëere peparöa kanöököl wëwë utpet wakaimaurök Anutuuk pötëaan ent ë nuulëëpënëak sum elnia. Pöt koolre siluwa lëngë yesa pötök won, <sup>19</sup>Kristoë i sum kësangringtak sum ëak ent ë nuulëaurö. Pi sëpsëp möön söëere kewil wonöpë ök wakaima.

<sup>20</sup>Pi ngaanëer yanger won wiaan pël ëëpënëak yaö mëëaupök peene akun pet irëpënëak yaëen arimëen tekeri orö rëaup. <sup>21</sup>Kristo pim pël ëa pötaan Anutuun kön wi kosang weseim wë. Pi Kristo weletakaan wal ë ulmëak ë morangia. Pël ëa pötaan Anutuun kön wi kosang wesak pim niöpnaataan ërëpsawiarang kor eim wë.

### Anutuu ngöntak ngolöp wes yanuulë

<sup>22</sup>Ar ngön këët ök niaan kat wiak ngaarëk yeö pël yaëen pötak arim lupre könöt kölam yanuwat. Pipët arim karuröen këëkë lup sant elmëënëak oröa. Pötaanök kosang wesak neneren lup sant ëeim ön. <sup>23</sup>Ar ngolöp wesak wil niulëen wë pipët, kö yesauröa naëaan won, kö nasën yaaö Anutuu ngön wëwëetaring kosang wiaapna pötakëlaan oröaurö.

<sup>24</sup>Pöta ngönte ngönëntak epël wia.

“Omnarö pit nönre koinötë ökörö.

Pitëm ë yerangi pöt puutë ököt.

Nönöt umön yarëaut, puut teënt kërë yesaut.

<sup>25</sup>Ën Anutuu ngön pöt kosang wiaapnaat.”

Anutuu ngön pöt ngön ompyaö pitëm ök niaa pipët.

### Kristo pi tiarim möör wap kosangët

**2** <sup>1</sup>Ar ngolöp wes niulëaurö pötaanök utpet ke nentere nent moolaë. Kaar aöre morök ë, war ëëre omnaröen utpet wesak aö pël yaaut sëp weseë. <sup>2</sup>Önga ngolöp wilauröa ëlöröa kapaatön kent yaë pöl arta ngönënë kapaaten kent panë ëen. Pël ëënë pöt kosang sak wëen Anutuu utpetetakaan kama yanu pötak kaö sak ompyaö önëët. <sup>3</sup>Ar yaap Aköpë sant yaalni pöten kat men yeë pötaan pël ëëë.

<sup>4</sup>Aköp Yesu, wëwëeta pepap, piik yal ëëë. Pi omën ka ök yarëauröa wap ompyaut öpënëak utpetat wël ë yemoola pöl omnaröak piin kaaö elmëen Anutuuk kön wiin isën möör wap wesir ulmëaup. <sup>5</sup>Ar Anutuuk wëwëet nina pörö piik yal ëak wap pöta ök sak Ngëengk Pulöökë tup sën. Pël ëak kiri yauröa ök sak arim lupre könöt Anutuun kiri yaalmëen Yesu Kristoë ëautaan arën kön wiin ompyaö ëëpnaat. <sup>6</sup>Nem yeniak pöta songönte ngönën pepeweri epël wia.

“Kat wi.

Ne Saion rosiraöök wap nent yewesir.

Wap pöt möör wap sum kaö panëët.

Omën namp piin kön wi kosang wasëpna pöp ëö nasëpan.”

<sup>7</sup>Ar piin kön wi kosang weseim wë pörö kön wiin ompyaö panë yaë. Ën omën kön wi kosang newasën pöröaan ngönëntak epël ëa.

“Wap omën ka ök yarëauröa wël ë moolëaut

Anutuuk ompyaut wesak möör wap wes yewesir.”

<sup>8</sup>Ën nenteta pitëmëen epël ëa.

“Pi kël kotuukë ök sak wëen narö ing wot möak kawiap ëëpnaat.  
 Ën kël kësangöökë ök sak wëen pötal urak kawi ngentiipnaat.”  
 Omën pörö Anutuu ngönte wa yoola pötaan pim ëëpënëak mëä pöl ing  
 wot möak kawiap ëëpnaat.

#### **Tiar Anutuu omën saut**

<sup>9</sup>Ar pöt pitëm ökörö won. Anutuuk pimëen nuwasën pim omën sak  
 kutöm Aköpëen kiri yaaurö. Ar pim omën wotpilörö. Koutak wëen puuk  
 yas niaan pim ëwa ompyautak ilëak wë. Pim ompyaö yaauta ngönte aim  
 önëak yas niia. <sup>10</sup>Ar ngaan omën pas wakaimauröak peeneek Anutuu  
 omën sak wë. Ar ngaan Anutuu ya ngëstak naön ëauröak peeneek pim ya  
 ngëstak wë.

#### **Tiar Anutuu inëen ëëpnaat**

<sup>11</sup>Nemorö, ne kosang wesak niamaan kat wieë. Ar yangerak yaamre  
 su kak wë pötaan koröpöökë kentre kaur arim lupre könötëen kööre tok  
 yaaö pipot sëp weseë. <sup>12</sup>Pël ëäk ngönën köpëlöröa tekrak wotpil ön. Pël  
 ëen pit arim songönten itenak, “Utpet yaaurö,” pël yenia pöt sëp wesak  
 Anutuu waisëpnaatak arim ompyaö yaataan piin yaya mapnaat.

<sup>13</sup>Ar Aköpön kön wieë omnaröa ngön kosangöt ngaarëk ön. Yang  
 omp ak wotöök wëaupre <sup>14</sup>pim yang ngarangk utpet yaauröen nga  
 maöre ompyaö yaauröen ping wesak maö pël ëëpënëak wes yamëa  
 pöröa ngön ngaarëk ön. <sup>15</sup>Anutuu kentöök arim ompyaö yaautak omën  
 köpël wë ngön kaar ya pipöröa këmöt ur mowariipnaaten kent yaë. <sup>16</sup>Ar  
 utpetetakaan wil nuulëen ompyaö wë. Pël ëëë omnaröen, “Utpetetakaan  
 wil nuulëen wë,” pël morök mëak ëlëëp utpetat ëënganok, Anutuu inëen  
 sak wë ompyaö ëeim ön. <sup>17</sup>Ar omën pouröen ping wesak an. Ngönën  
 omën arim karuröen lup sant elmëen. Anutuun kasinkasin elmëen. Yang  
 omp aköpön ping wesak an.

#### **Kristo tiarimëen këlangön kat wiak pim ingtak sëpenëak kanö pet elnia**

<sup>18</sup>Inëenörö ar, arim kaöaröen kasinkasin elmëak pitëm ngön ngaarëk  
 ön. Pöt omën ëpre wiap yaalniauröaan pëen won, yaar ser yaauröaanta  
 tapël elmëen. <sup>19</sup>Pöt eptaanök. Pit ar saun wonrek këpök këlangön kat  
 yaniwiin Anutuun kön wieë ya sangën naën wëen pi arën kön wiin  
 ompyaö ëëpnaat. <sup>20</sup>Ën ar utpet nent ëen kaöaröak pës yanimöön ya  
 sangën naën ëënë pöt Anutuuk kön wiin ompyaö ëëpën ma? Pël naëpan.  
 Wotpil wëen këlangön kat yaniwiin ya sangën naën ëënë pötakëer  
 Anutuuk kön wiin ompyaö ëëpnaat. <sup>21</sup>Anutuuk ar Kristoë ëaul wotpil  
 wë këlangön kat wiinëak niulëa. Pi arimëen këlangön kat wiak pim  
 ingtak sënëak kanö pet elnia. <sup>22</sup>Pi utpet nent naënëp, pim këmtakaan

kaarre morök nent naaröönöp. <sup>23</sup> Omnaröak utpet wesak yemaan kangiiir nemaan äa. Këlangön kat yemowiin kangut mampënëak nemaan, Anutu wotpil wesak ngön ë pet yairaup pimëen yaö mowesa. <sup>24</sup> Tiarim utpetatök pim rangk isën këra yetaprak möön wel wia. Pöt tiar utpetat sëp wesak wotpil öpenëak pël äa. Pim koröpö utpet wesa pötaan tiar ompyaö san. <sup>25</sup> Ar ngaanëer pol sëpsëpöröa yaë pöl kanö wiaan irikor ëeimaurö. Peene pöt, arim ngarangkep Kristo, lupre könötë pepapök, yas niaan pim naë oröak wë.

### Öngre ompöröa ngönte

**3** <sup>1</sup> Öngörö ar, inëenöröa yaë pöl arim ompöröa ikanöök wë pitëm ngön ngaarëk ön. Pël ëen omp narö Anutuu ngön ngaarëk naön ëëpna pörö arën itaangkën ngön nemaan yaëen arim ompyaö yaauten itenak pim naë rë olapnaat. <sup>2</sup> Yaap, arim ompörö ar Anutuun kasinkasin yaalmëem kölam wë pöten itenak pim naë rë olapnaat. <sup>3</sup> Ar koröpöt pëen ompyaö sëpnaan kepön ëpötë ë morangiire polere kal ëere ulpëen ompyaö retëngöt më pël ëëngan. <sup>4</sup> Om ëpre wiap arim lupötë ëlëëp wia pötök arim lupre könöt ë morangiin. Pël ëënë pöt sëpar nasën kosang wiaan Anutuuk itaangkën isëpnaat. <sup>5</sup> Öng ngaan Anutuun yaö sak wakaima pörö pit tapël Anutuun kön kosang wieë pitëm ompöröa ikanöök wë ngön ngaarëk weim wakaima. <sup>6</sup> Sera pi tapël äak pim ompöp Apramë ngön ngaarëk weimeë piin, “Kaöap,” pël maima. Pötaanök ar pim äa pöl ompyaö yeem arim ompöröa ëëpna nenten kas naën ëënë pöt pim ök önëët.

<sup>7</sup> Ompörö, arënta tapël niamaan. Ar öngöröaring wë arim Anutuun kimang ngön ök manëët il wariipanëen pit weere kosang wonörö pël weseë ompyaö elmëen. Pitta wëwë kosangtaan yaö mëëaurö pötaanök.

### Lup kopëtemer sak öpa

<sup>8</sup> Epët ar pouröaan niamaan. Ar lup kopëtemer sak omnaröen yaköm ëen. Arim karuröen Anutuu omnarö pël weseë lup sant elmëak komre kolap elmëeimeë arim lupöt wak irëak ön. <sup>9</sup> Omnaröak utpet yaalniin kangiiir elmëënganok. Utpet wesak yeniaan kangiiir manganok. Won, Anutuuk welaköt elniipënëak yas niiaurö. Pötaanök pël yaëen pöt Anutuun pitta welaköt elmëëpnaan kimang man. <sup>10</sup> Pöta ngönte ngönëntak epël wia.

“Omën ërëpsawiarang ompyaö öpënëak kent yaë pöp pim këmtakaan ngön utpetere kaaröt orööpan.

<sup>11</sup> Utpetat kasëng menak omën ompyaut ëëp.

Pël äak mayaaptak öpnaan ke urak pöta yaat mëmp.

<sup>12</sup> Aköp pi omën wotpil yaauröen itenak pitëm kimang yamëëaut kat yemowiaup, utpet yaaurö kasëng yemengkaup.”

### Ompyaö yaautaan këlangön kat wiipenaat

<sup>13</sup>Karurö, ar ompyaö sënëetaan kosang yengentiin talëpök utpet niwasëpën? <sup>14</sup>Ar wotpil wëen këlangön kat yaniwiin pöt ërëpsawi ëënëët. Ar pitën ya ngës kön wiak kas ëëngan. <sup>15</sup>Arim könre lupöt Kristoon kasinkasin ëak kaö mowasën. Pël ëën omnaröak arim omën ompyaut önëak kor yeë pöta songönten pëël yeniaan pöt ompyaö wesak ya wiaptaring ök manëël kopëta wesak ön. <sup>16</sup>Pël ëak arim könöt kengkën ëënëën wotpil ön. Pël ëënë pöt omnaröak arim Kristook yal ëak ompyaö yaautakël utak utpet wesak yeniem pitëm kaar yaauta songönte tekeri sëën ëö sëpnaat. <sup>17</sup>Anutuuk kön wiin wotpil yaautaan këlangön kat wiipena pöt ompyaö ëëpnat. Ën utpet yaautaan pël ëëpena pötaar pangk naën ëëpnat.

### Kristo pi tiarim saunatëën wel wia

<sup>18</sup>Kristo pi wotpilëpök tiarimëën wel wia. Pi wotpilëpök utpetarö tiar Anutuu naë wa nuulëpënëak akun kopët nent pël ëa. Koröpö wel yawiin könöp wel nawiin ëa. <sup>19</sup>Pël ëak pim könöp omën ngaan wel wiauröa kön wii kaatak wëauröa naë së ngönën ök mëëa. <sup>20</sup>Kön pörö omën ngaan Noa pim akunetak Anutuu ngön wa olaimauröa könörö. Noa pi wangaö ket ëeim wëen Anutu pit pim ngön ngaarëk öpënëak pimtë ya wiap yaautak om korkor elmëeima. Pël ëautak omën kopët 8 pöaar pëen pim ngönte ngaarëk wak wangaöök ilaan i ngep naën ëa. <sup>21</sup>I pipët ngönën i yanimë pöta ökre waste. Pöt epël yaë. I yanimë pöt koröpöökë kewilötëën naën, Anutuun kimang yemaan utpetat won yanuwas. I yanimëën Anutuuk Yesu Kristoë weletakaan wal ëa pötaan ompyaö yanuwas. <sup>22</sup>Pi weletakaan wal ëak kutömweri së Anutuu yaapkëël wëen enselöröere kutömweri yapinring weëre kosangringörö pim iri wë.

### Kristoë këlangön kat wia pöl yeem utpetat kasëng mempa

**4** <sup>1</sup>Kristo pi yangerak këlangön kat wia. Pötaanök pim ëa pöten kön wieë kosang sën. Namp koröpöök këlangön kat wiipnaapök utpet yaaut sëp wasëpnaat. <sup>2</sup>Pötaanök peene ngës reak koröpöökë kentre kauratë ënëm ëënganëp Anutuu këm ngönte pëen ngaarëk weim ön. <sup>3</sup>Ar ngaan ngönën köpël wë köpëlöröa kentöökë yaaut epël eimaurö. Öngre omp nga ëëre omën utpetatön kentre kaur ë, i ngaat nak kön irikor ëëre këere imën keimön nëere i ngaat keimön nak utpet ë, Anutuu urtak omp ak kaaröröaan ngëëngk mowasö, pël yaaö pöt ë waiseimeë pöt kaö wesak wakaimaurö. <sup>4</sup>Peene pöt, utpet ke pilöt pitring naën yeë pötaan yaan sak utpet wesak yenia. <sup>5</sup>Pël yeniaatak wë ënëmak Anutu omën welere öpöröa ngön ë pet irëpnaap pim naë së tauak pitëm eimautë songönöt ök maan kangut mampnaat. <sup>6</sup>Pël ëëpnaat pötaanök Kristo pi omën ngaan wel wiauröa naë së ngön ompyaut ök mëëa. Pit koröpööring wel wiauröak Anutuu öp wë pöl könöpring öpna kanö pitëmëen orööpënëak pël ëa.

### Weëre kosang Anutuu yaningk pötring ya mëmpa

<sup>7</sup>Karurö, omën ël epot poutë won sêpna akunet temanöm yes. Pötaanök ompyaö wesak Anutuun ök manëëtaan arim könre lupöt pëen weseë. <sup>8</sup>Pël ëäk lup sant yaauten kön wiin kaö sëen kosang wesak lup sant ëeim ön. Pël yeem neneraan utpet yaaut ngep ëënëët. <sup>9</sup>Ar karurö arim naë yewaisën omnant keimön elmëënganëp kaaö köpël sant mowasën. <sup>10</sup>Ar pourö Anutuuk ngönën ya mëmpunëak neenem weëre kosang ke nentere nent nina. Pötaanök arim karurö kaamök elmëënëak ompyaö wesak weëre kosang pötring epël mëmpun. <sup>11</sup>Namp ngönën apënëak pöt Anutuu ngön pëenöt ap. Namp narö kaamök elmëëpënëak pöt weëre kosang Anutuuk yamangk pööring pël ëëp. Pit pël yaëen omnaröak Yesu Kristoë weëre kosangöök yaë pöten itenak Anutuun yaya mapnaan pël ëëp. Ë rangiere weëre kosang pöt pim naë wieëautök wiakaim wiaap. Yaap.

### Kristoë këlangön kat wia pöl ëëpenaat

<sup>12</sup>Kar panëëro, morök kësang nent arim naë orööpnaan yaë. Pöten itenak omën ngolöpët pël wesak yaan sëngan. <sup>13</sup>Morök pöt yaaröön Kristoë këlangön kat wia pöl, “Tenta yeë,” pël kön wiak ërëpsawi ëën. Wë ënëmak Kristoë ë rangiet tekeri orö yarëen ërëpsawi kaö ëënëët. <sup>14</sup>Omnaröak arën Kristoë omnarö pël weseë utpet wesak yeniaan pöt ërëpsawi ëënëët. Pitëm pël elniipna pötak Anutuu Pul ëwaring pö arring wë pöt pet elniipnaat. <sup>15</sup>Arim naëaan namp mënautaan ma kain ëautaan ma utpet ëautaan ma omën muntaröa yaat wa ëp ëautaan kangut elmëen këlangön kat wiipan. <sup>16</sup>Ën omën namp pi Kristoë omnamp pötaan këlangön kat yawiem pöten ëö sëpanëp Kristo pimop pötaan Anutuun yoöre ërëp map.

<sup>17</sup>Anutu pim omnaröa songönte tekeri wasëpna yaat mëmpna akunet oröak wia. Pötaanök pim omnarö tiarim naë ngës réak ngön ya nimëmpna pötak omën pim ngön ompyaut ngaarëk naön yaaurö tol elmëëpën? Elei, pit këlangön kaö kat mowiipnaat. <sup>18</sup>Pöta ngönte ngönëntak epël wia.

“Anutuuk omën wotpilëp utpetetakaan kama wak ompyaö wasëpënëak ya kaö mënak ompyaö yewasën pöt, omën pi kasëng menak utpet yaaup tol ëëpën?”

<sup>19</sup>Pël wia pötaanök omën Anutuu kön wiaul këlangön kat yawi pörö wotpil wë pitëm wëwëet Anutu pim moresi ulmëëp. Pi ket elniaupök pimtë ök yenia pöl ompyaö wesak kaamök yaalniaup.

### Wotöököröa ngönte

**5** <sup>1</sup>Ngönënë wotöökörö, neenta wotöök arim karipök, kosang wesak niamaan. Nem itöök Kristo këlangön kat wiak wel yawiin itenaupök wë ënëmak pim ë rangiet tekeri sëen piiring pöta pep sumaap. Pötaanök niamaan kat wieë. <sup>2</sup>Anutuu sëpsëpörö ngarangk ëënëak niiaurö këkre

töötak won, ya ngëstak itenak ngarangk elmëen. Pël yeem monere uröm won, ya mëmpunëëtaan ulöp es ngaaring mëmpun. <sup>3</sup>Pël ëak omën omp ak sak arim ngarangk elmëenëak niulëa pörö il mowasnganëp arim ënëm ëëpnaan ngönënë kanöök wot ran. <sup>4</sup>Pël ëen Kristo, sëpsëp ngarangk kaöap, pim tekeri sëpnaatak omën ompyaö weit kangiiir ningkën önëët.

### Tiarimtën wak irëak ngarangk këëkë ëëpa

<sup>5</sup>Ulwasörö, arënta tapël niamaan kat wieë. Ar arim kaöaröa iri ön. Pöt ngönëntak epël wia. “Anutu pi omën pitëmtën wak isak yaurö wak yeirëaup. Ën pitëmtën wak irëak wëaurö ompyaö yaalmëaup.” Ngönëntak pël wia pötaanök ar kotre kaö pourö arimtën wak irëak neneraan inëen ëeim ön. <sup>6</sup>Tok oriak Anutu weëre kosangringëp pim iri ön. Pël ëen pimtë akun wia pötak ar wak isëpnaat. <sup>7</sup>Puuk ngarangk elnieim wë. Pötaanök arim naë könömöt oröön pöt pim moresi mowiin.

<sup>8</sup>Ar könöt wotpil wesak arimtën ngarangk ëeim ön. Kent toköröa imën mëmpënëak këm nga ëak sak waiseim wë pöl arimëen nga yaaup, Seten, pi arim tekarak wë talëp mëmp ma talëp mëmp wesal yaë. <sup>9</sup>“Ingre mor sa tenim kar yang ëlötë wëaurö morök ke tapël elmëeim wë,” pël weseë kön wi kosang yewesautak kosang sak wë pi ke ur momëen. <sup>10</sup>Pël ëak akun kot nent këlangön kat yawiin Anutu, komre kolap yaaup, Kristook yal menak piiring ë rangi kosang kö nasëpanëëtë pep sënëak yas niaup, puuk ompyaö nuwesak tau nuulëak weëre kosang nimpnaat. <sup>11</sup>Weëre kosang pöt pim naë wiakaim wiaap. Yaap.

### Ngön mëët

<sup>12</sup>Ne ngön kot epët Sailasën maan retëng yaë. Pi nem ngönt këëp. Ne arim lupöt kosang niwesak komre kolap arim wak wë pöt Anutuu komre kolap këët pöt ök niamëak yeë. Piptak taë sak ön.

<sup>13</sup>Papilon kakaan ingre mor sa Anutuu arring yaö wesaurö yoöre ërëp yenia. Ën Maak nem ru sak wëaup puukta tapël yenia. <sup>14</sup>Neneren lup santak yowe mëak mor meneë.

Kristook yal menak wëaurö arim naë mayaap wiaap.

[Yok pi tapët.

Ne arim karip, Pita.]